

四庫全書

集部

欽定四庫全書

集部

武溪集卷十五至

十七

詳校官給事中臣李臺

檢討臣何思鈞覆勘

覆校官中書臣呂雲棟

校對官編修臣沈清藻

謄錄監生臣王鍾岱

謄錄監生臣王鈺

欽定四庫全書

武溪集卷十五

宋 余靖 撰

表

免轉給事中狀

右臣今月二十日進奏院遞到勅誥各一道授臣給事中者竊以賞為國典必中事功寵溢情涯敢忘辭避伏念臣揆材至薄賦命多奇幸遇休明免居羈賤向以邊臣失備蠻寇內侵越從縲紲之中起親金革之事漫懷

嫉惡素匪知兵所至面牆幾同學製賊鋒尚銳勝筭無
施身負重而日增民在溺而同窘果煩膺眷特輟樞臣
狄青以人傑之雄摠其師律孫沔以國器之重濟以事
機號令修明士馬奮勵故得克醜敗亡而絕迹蒸黔蘇
復以息肩青所以定二廣之阡危沔所以正一方之經
制臣則幸於免戾何止備員今乃例被綸言同增官秩雖
念勞勸善國家寧厚於恩章而揣分量能私計實非於
已力伏乞察臣誠請追改命書則朝廷無濫賞之譏微

臣免貪功之過干冒冕旒臣無任待罪激切之至所有
降到勅詰已送桂州軍資庫收管聽候朝廷指揮繳納
免轉工部侍郎狀

右臣今月十三日三班差使殿侍韓某乘遞馬賫送到
中書劄子并勅詰各一道蒙恩授臣尚書工部侍郎仍
就賜銀二百兩者前恩未謝後寵復加內揆空疎第深
覲愧伏念臣出於寒族起自諸生素乏軼羣之材久罹
負俗之謗昨以蠻酋叛渙嶺服震驚雖分守土之權莫

展擒兇之策屬元戎之善勝加邇臣之協謨因此安邊
幸於免戾豈謂皇明遠照寵數薦臨且方上讓章蓋慚
非據而未承報旨更冒今榮揣已力而實微干物議而
為甚用傾愚懇上瀆天聰願回過恩庶全薄祜俾雷雨
之澤無至妄施則草茅之姿免於深譴除就賜銀已受
領外所有齎送到勅誥不敢祇受乞行回納已牒桂州
軍資庫收管聽候朝廷指揮伏望聖慈特賜俞允但臣
無任

第二狀

臣某言昨於五月內進奏院通到勅誥蒙恩授臣給事中依前知桂州充廣南西路都鈐轄經畧安撫使尋具狀辭讓准六月四日中書劄子勘會余某已降勅命除授工部侍郎奉聖旨余某所除恩命即令祇受更不得陳讓者中謝伏念臣才非應務識不逮人徒邁光華得詣祿仕向以邊臣失備蠻孽侵疆眷言苦塊之居適在干戈之地遽蒙朝命俾預兵謀道路之勤敢忘夙夜軍

旅之任素昧韜鈴雖居戎馬之間蔑著涓塵之效幸賴
聖宸成筭樞輔專征因節制之有歸勵偏裨而同力兵
鋒一集謀主先擒羣兇散亡庶民休息攻之必取蓋有元
勲職在具僚過蒙厚賞內懷非據嘗叙至誠乞回濫恩
庶全素志豈謂皇明下照寵渥薦加委之輯寧靡容辭
避此蓋皇帝陛下如天廣覆與物無私譬春夏之和邇
遐咸被比雷雨之施甘苦皆霑念孤臣之無庸與元戎
而並命仍加敦諭彌用憂兢敢不祇率政條舉寬民瘼

庶於境域同此康樂所有除工部侍郎勅誥已別狀聞
奏伏望聖慈許令辭讓但臣無任

謝轉工部侍郎表

臣某言昨蒙恩旨差三班差使殿侍韓某賚送到勅誥
一道授臣工部侍郎尋具狀奏聞乞行回納准七月五
日中書省劄子奉聖旨所降恩命即令祇受更不許辭
讓者中謝伏念臣生自寒鄉早逢明主知名驟進嘗叨
四戶之官負謗閑居猶紆三品之綬嚮還喪次甫畢喪

期屬嶺表之騶騷預軍興之驅策徒竭前茅之慮蔑聞
橫草之功所賴者廟堂講受於聖謨斧鉞肅將於王怒
獻戎之捷蓋主將之勲有成從驃得侯於國家之恩大
厚內愧冒塵於職任再乞追還於詔書誠出誤知不容
退讓此蓋皇帝陛下恢乾坤之廣度垂日月之至明賞
善勸能義存寧僭記功忘過意切魚容致此非材屢增
顯秩敢不恪遵寬詔欽率彝章卧鼓滅烽上繫於聖化
思艱圖易庶保於民和臣無任

謝加勲封表

臣某言十二月二十六日進奏院遞到勅誥各一道蒙
恩授臣依前守尚書工部侍郎加輕車都尉進封始興
郡開國侯食邑五百戶仍放朝謝者祀典之修允合丕
貺恩章之廣覃及具臣中謝恭以國家祚纂堯基化恢
禹服配天昭孝脩三聖以成儀灑澤均禧浹四方而渙
號伏念臣素微材術叨預藩宣方趨乘障之勤莫廁侍
祠之列豈期雷雨之施不遺管蒯之微盟府何功遽勲

官之見錫爵名加等仍鄉郡以兼榮揣分逾涯省躬增惕敢不外寧邊隙內撫民封惟堅大馬之誠上答乾坤之造臣無任

免充集賢學士表

臣某言今月二十一日進奏院遞到勅誥各一道蒙恩授臣依前守尚書工部侍郎充集賢院學士依舊知桂州并准樞密劄子中書樞密院同奉聖旨令臣分析見孫或近親骨肉一名聞奏者松楸之戀誠本告歸雨露

之恩事出非望撫躬懷惕聞命若驚中謝伏念臣素乏
藝文固無材武幸逢聖旦早列仕途間者起自廢居奄
遭荼苦喪期未艾蠻事遽興首預詔除敢忘宣力賴元
戎之制勝致闔境以再安臣以菲材例增優秩亦嘗乞
收印綬還襲縗麻狡寇尚存私誠莫遂近以遠擒賊媼
稍息邊虞願返鄉閭修營壠墓而遽蒙恩旨加賜職名
未申上報之誠已掇要君之過再念臣前歲與起居舍
人楊畋閣門副使曹修同時受命經制賊盜畋等各懷

忠藎並練權謀當單車制禦之初值劇賊猖狂之際雖英韶處置偶失事機而連賀保全皆由指授今畋等舊官未復而臣屢承寵命揆茲進退之理彌深兢愧之懷乞回過恩庶伸微志臣今乞將所授集賢院學士及兒孫恩澤並各回納只乞特與楊畋曹修等牽復舊官所貴上有念勞之恩臣無過分之責其有遞到勅誥已牒送桂州軍資庫收管聽候朝旨繳納伏乞聖慈特賜俞允

謝充集賢學士表

臣某言三月二十一日准進奏院遞到勅牒官誥各一道蒙恩授臣依前守尚書工部侍郎充集賢院學士依舊知桂州并准八月十一日中書劄子奉聖旨不許辭讓者封章上扣期遂於私誠宸旨下臨靡容於遜避中謝伏念臣命多奇隻器本疎頑起草掖垣嘗因毀去懷章邸邸遽以喪歸向緣蠻落之內侵遂假獸符而外禦昔賢之赴公難有警則腰經以從權人子之報私恩已

事則衣縑而返次敢再援於古義願追服於素冠遽沐
天慈過矜擢散仍卽藩垣之寄俾叅英俊之遊重念元
帥成功附驥已叨於臚仕常僚失職拔茅未復於舊聯
乞還過量之恩少遂推賢之志豈悟聖謨廣大國典寬
明俯鑒無他之賜不加非言之罪特申前命俾踐華途
此蓋伏遇皇帝陛下堯舜聰明乾坤覆幬春生秋殺不
私雨露之濡尺短寸長必盡輪轅之用致茲蒙鄙屢玷
寵光敢不祇率郡條樂宣吏職農桑舊俗咸俾於懷生

荒獷外區悉期於稟朔冀稍裨於化體庶上答於皇慈
臣無任

免戶部侍郎狀

臣今月十四日進奏院遞到勅誥各一道蒙恩特授臣
戶部侍郎依前充集賢院學士候今任成資日仍令再
任者聞命驚惶伏增隕越伏念臣才非應務智不逮人
徒以虛名嘗叨近著頃遭讒構甘在棄捐屬蠻事倅興
起臣於喪次而兵勢未集謀慮弗周力小任重日增憂

惕及至歸仁之勝三軍凱旋破賊者乃臣青之勲勞撫
民者皆臣沔之經制臣稟受節度謀無已出逮乎遠縛
賊毋擒誅寇黨內則朝廷威令外則夷獠協同於臣愚
拙何功之有昨聞轉運提刑司舉再任臣尋以心力衰
耗不堪再任已具狀乞依舊分司於韶州居住庶得修
營墳墓今來忽頒成命就陟左曹恩渥至優實為過分
清秩厚俸誰不欲之事既逾涯豈宜安處伏緣本路外
接西廣六蕃南連交趾九道沿邊溪峒一百餘州苟失

撫綏立生患難非臣衰朽負謗之人能堪久任所有降
到勅誥不敢祇受已牒送桂州軍資庫收管聽候朝廷
指揮伏乞檢臣前奏許令換一散秩依舊分司於韶州
居住所有邊任伏望別擇材賢干瀆冤疏臣無任

謝轉戶部侍郎表

臣某言准都進奏院遞到勅誥各一道蒙恩授臣尚書
戶部侍郎依前充集賢院學士知桂州候今任成資日
仍令再任并准樞密院劄子奉聖旨依前降指揮不許

辭讓者邊亭擇帥願避於才能天綽宣恩靡容於遜讓
中謝伏念臣素亡學術濫竊時名屬蠻酋之擾邊即喪
廬而受命雖懷急病之意而無弭難之才名分一面之
權實稟元戎之笑歸仁之捷臣力何施特磨之擒衆謀
允濟以致羣克遠遁九譯難通天假手於外夷鬼得誅
於大懟皆皇威之震疊致醜類以殲夷幸免瘝官已慙
尸祿豈謂曲成天獎就錫詔亟增秩而留用漢朝之故
事撫封以舊仍越嶺之攸居無易教條俾安氓俗重念

臣早緣積毀嘗隸別都久遺鵷鷺之行頗樂田園之趣
因茲過寵當思避賢惟冀罷歸庶全冲退而乃再頒綸
旨俾踐恩章願反汗以尤難但撫躬而增惕此蓋伏遇
皇帝陛下天慈廣覆乾體旁羅士濟濟而必臻術九九
而無棄致是草茅之質薦承雨露之恩謹當祇率政經
增修戎畧荒忽之外俾銷旅拒之謀瘡痍之餘期識中
和之治臣無任

潭州謝上表

臣某言伏奉勅命就差知潭州軍州事充荆湖南路安撫使已於今月二十三日到任上訖久居炎徼忽荷天恩雖尚遠於闕庭幸無虞於瘴癘中謝伏念臣素無學術徒遇休明宦路風波艱危備歷君恩雨露涓滴未酬頃惟欒棘之哀尚淺椿祥之制屬溪蠻之叛渙軼邊戍以跳梁攻圍越臺侵逼庾嶠雖微臣修完堡障本期自固於家林而朝廷奪去縑麻遽俾分持於戎律懼薄材而敗事會元帥之成功假號渠魁既遠逃於夷域主謀

克媼俄就戮於天街蓋震疊於皇威致救寧於蠻落臣
無纖芥之力徒居戎旅之間職是累年空尸厚祿豈謂
忽承丹詔還撫舊封再見昔時之山川如全此生之首領
此蓋伏遇皇帝陛下天慈廣覆日照無私公聽並觀用
臣於衆毀必察之際記功忘過知臣有臨危不避之誠
每遇急難必蒙驅策既臻平定未忍棄捐重施造化之
恩復委藩防之寄謹當率循政體講守邦經封內之民
或未康必詢其庶隱境土之兵猶未戢亟議於綏懷圖

報國恩庶逭官責臣無任

青州謝上表

臣某言蒙恩就差知青州充京東東路安撫使放朝辭疾速發赴本任已於今月二十五日到任上訖荆湘南部未著善聲海岱名區再叨方任揆能至薄拜命若驚中謝伏念臣出於寒微素無才業因緣感旦忝竊通班向自喪廬起從邊寄名叨末將慙應變以非長筭稟元戎幸因人而成事留撫凋瘵頗綿歲時無復望於寵榮

止願畢於婚嫁吳芮書忠之地尋獲便安營邱賜履之
封驟更委寄冒進誠知於尸祿懇辭恐涉於要君恪奉宸
恩聿臨所部況乎禹平九土青有古名周建諸侯齊為
大國俗幾一變之道士有四豪之風誠儒學之興居亦
寇盜之時起宜求當世之碩彥以舉列城之政綱豈意
樗櫟之散材亦叨兵馬之大郡此蓋伏遇皇帝陛下廣
乾坤之覆載恢堯舜之聰明不責纖芥之勞徒軫遺簪
之舊矜其晚節屢徙要藩謹當祇率國章詳求民瘼

不矯激以沽譽無慘刻以失中慕君子樂易之宜宣朝廷寬大之意勉圖所報庶或有成臣無任

謝加護軍食邑表

臣某言今月九日准都進奏院遞到勅牒官誥一道授臣依前守尚書戶部侍郎充集賢院學士加護軍食邑五百戶散官封食實封賜如故仍放朝謝者歲事闋宮講行閱典均禧函夏敷及具僚中謝恭惟皇帝陛下摠攬蘿圖統承熙運謹蹈蒸蒸之孝寅守丕丕之基豐潔

染盛內盡享親之志序陳昭穆躬修合祭之儀既成瓘
鬯之盛容廣布蓼蕭之渥澤下周朝黻普錫言綸臣素
乏時材濫叨藩寄駿奔述職阻捧於籩豆渙汗推恩並
陞於勲爵居慙德詔行畏食浮自天之命難違踏地之
憂愈積誓堅死節上答鴻慈但臣無任

免轉吏部侍郎狀

今月十七日准進奏院遞到勅誥二道授臣吏部侍郎
依前充集賢院學士散官差遣勲封食實封賜如故者

竊以國家列布衆職用待羣材至如文昌之居應三垣之上象天官之重貳六府之首卿當於國器以揀求豈宜年勞而叙進伏况臣智謀甚短名德素輕久冒朝恩屢膺州任嘗思引退式冀保全儻綸綍之濫加必負乘而益過願回誤寵庶遂初心所有降到勅誥欲乞繳納中書已牒送青州收管訖

免轉尚書左丞知廣州狀

并答詔

右臣准閣門告報蒙恩授臣尚書左丞依前集賢院學

士知廣州充廣南東路都鈐轄經畧安撫使替魏琰者
伏念臣昨於慶歷中自知制誥分司南京於韶州居住
是時蠻賊唐和走在嶺表已有臣僚言臣得罪不合令
居嶺南尚賴聖明含容免臣遷徙至皇祐中蠻賊儂智
高叡擾二廣臣於父憂中首被詔命起知潭州移知桂
州充廣南西路經畧安撫使即與交趾公牒往來尋在
狄青陣中戰敗蠻賊收復邕州俄又捉獲儂智高母累
蒙聖恩遷官屢曾陳乞依舊分司不蒙俞允去歲甲峒

作過准中書劄子自青州召臣差充廣南西路體量安撫使面奉聖旨許令牒報交趾差官前來商量及至差費嘉祐等到欽州猶差人前來體探是與不是臣親身仍言臣與先王有分今來差臣知廣州緣廣州與交趾海道相通切慮談者易生構間若言臣交通外夷則於臣家族不便兼廣州大市居民元無城池圍捍近歲議者多欲修築羅城若從羣議必須大興力役以民力凋弊之後加臣才術短淺當此重寄必致曠敗臣今欲乞

只守舊官差知荆南潭州一次庶免愆謗干冒冕旒無任
待罪惶恐之至伏望聖慈特賜俞允

答詔

勅余靖省所奏准閣門告報蒙恩授臣尚書左丞依前
集賢院學士知廣州充廣南東路都鈐轄經畧安撫使
臣才術短淺當此重寄必致曠敗欲乞只守舊官差知
荆南潭州一次事具悉聞者邇吏無狀視盜不謹致茲
蠻蜚擾我嶺嶠番禺之地嘗罹寇患凋弊迄今傷夷未復牧

守之任推擇惟難以卿策慮無遺忠義有素文理足以綏衆武備足以折衝進居丞轄之重付畀方面之寄必能宣明威信朕庶幾無南顧之憂矣而卿何嫌何疑復多讓焉是彰朕之不明而無以知賢也當體至意往服厥官所乞宜不允故茲詔示想宜知悉

再免知廣州表

臣某言准今月十七日詔書以臣蒙恩授尚書左丞依前集賢院學士知廣州臣才術短淺當此重寄必致曠

敗欲乞只守舊官差知荆南潭州一次所乞宜不允者
外朝疎遠固有於官儀中詔丁寧遽頒於天語推聖恩
之過厚在臣分以何安內愧空疎理當辭避中謝伏念
臣才非應務智乏周身謗缺易成風波可畏頃者薦修
鄰好三使虜庭始由歡聘以通情終於習熟而為罪一
時儂蠻干紀幕府專征蕩寇黨則元帥之謀擒魁媼則
羣夷之力曾無涓效屢玷勲書去歲峒蠻憑陵官軍沮
折詔臣喻指事止綏邊況是單車之戒行已蒙叙進豈

可彤墀之復命再忝陞資切緣嶺海之遙藩垣之重若
方隅之有警則退讓以無名當今時在弭兵理非避事
就近而不就遠雖曰便安辭易而不辭難敢期煩瀆且
又越臺之境胡賈雜居古者城無外墉當由土之疎惡
謀於修築殆及旬年計其徒庸難乎速就惜民力則謂
之弛備徇衆議則困於勞人玩寇之謗若興覆族之誅
可懼矧以地聯鄉曲勢有嫌疑儻回渙汗之恩實荷保
全之賜臣情願不就轉官恩澤乞只守舊官差知荆潭

一郡謹奉表陳乞以聞伏望聖慈特賜俞允千冒旒袞但
臣無任

廣州謝上表

臣某言奉勅差知廣州軍州事兼管內勸農市舶使提
點銀銅場公事充廣南東路都鈐轄兼本路經畧安撫
使已於今月十八日到任上訖斗筭器小方面任隆海
國雖遐聖恩尤厚中謝伏念臣稟生卑薄賦性顓愚誤
蒙當宁之知殊乏防閑之慮三聘未羈之虜終以左遷

一彈不孝之人遭其返噬既不虞而致毀固無望於復
燃就喪次以家居屬儂蠻之寇境愚謂古之卿士退處
鄉閭或遇凶荒之期賊盜為梗則必同堅堡壁用庇族
姻謀與守臣共伸此議朝廷因其急病誤謂知兵起於
縑絰之中委其金革之事以至絕交夷唇齒之援擒寇
魁子母之親正軍刑於藁街愴國威於銅柱在見聞之
或異亦讒謗之互興上賴天慈屢更藩寄去歲邕邊失
策納彼逋逃峒獠恃強遂成侵擾邏司喪元而潰敗列

郡聞風而震驚因驛騎以召臣俾單車而諭指雖島夷
聽命願誅首惡之人而寨將貪功未絕交爭之患亦既
與之約束各守封疆苟邦令之必行諒吾圉之能固猶
以嶺服之外越徼相通俾臨此州以辦邊事竊惟兵火
之後瘡痍未平力役尚繁生業猶困將祈存恤當擇循
良再具表陳莫回恩旨此蓋伏遇皇帝陛下乾剛下濟
離照旁羅儻寸有所長則使之必報輪駟無遺於木鴈
潢汙或薦於王公致此非才亦叨重任敢不率勵愚慮

勉守孤忠察蕃漢險易之情宣陛下憂勤之意庶乎萌
隸同被休明臣無任

謝加勲邑表

臣某言今月二十七日進奏院遞到勅牒官誥各一道
伏蒙聖恩授臣依前守尚書左丞充集賢院學士加上
護軍進封開國公食邑五百戶散官實封賜如故者合
宮禮成綿區澤普不遺遐遠咸被沖澍中謝恭惟皇帝
陛下昭事上穹丕承洪緒徧舉累朝之濶典再修宗祀

之盛儀即露寢以達誠御端闈而渙號旁周覆載罔不懽呼下逮搢紳咸加命數臣器能無取禮秩兼優護諸將以書勲冠五等而疏爵乃增稍食備極寵靈敢不荷生育之恩勤簡惠之政誓全苦節上答宸慈但臣阻守外藩不獲奔詣闕庭臣無任

謝轉工部尚書表

臣某言今月十九日進奏院遞到勅誥各一道伏蒙聖恩授臣工部尚書依前充集賢院學士加柱國食邑五

百戶散官實封賜如故者龍德飛天蘿圖興運曠蕩之
澤遐遠不遺

中謝

伏念臣學謝無明器慙遠到寅緣孤

進遭遇先朝亟登詞翰之科頻居文史之任遽繇諫路
擢掌王言常欲北屈匈奴南羈勁越未能勝任每預遣
行曾無橫草之功連被拔茅之寵屢委臨於戎律久陪
貳於文昌此蓋伏遇皇帝陛下嗣守丕基渙發大號乾
坤之造海嶽至大而必包雷雨之恩動植無微而不及
致茲散拙亦預甄陞素乏羽儀之才遽當喉舌之任將

何以根本萬事出納五言謹當祇畏簡書恪修條教更
勵委珠之節不忘曳履之忠庶答天慈以逃官謗但臣
守遠藩鎮不獲奔詣闕庭臣無任

武溪集卷十五

欽定四庫全書

武溪集卷十六

宋 余靖 撰

表

謝續支請受表

臣某言今月十六日准中書劄子奉聖旨依前守光祿少卿分司南京許於韶州居住令三司接續支與請受者有命自天再霑於幽隱無功受祿但益於戰兢中謝伏念臣素乏器能生在遐邇幸逢聖代登歷仕階夫何

闇淺之才常居文雅之選屢蒙驅策罔避險夷頃因專對之勤擢在邇臣之列深虞福過尋已謗生仇人之訐得行逐客之書難上退歸田里坐易歲時甘海嶠以陸沉沐天慈之再造起於謫籍付以伍符上荷君恩固無宜於堅讓適當父病難捨之而遠行重瀝血誠果從私便更議俾停於月廩家居尤畏於簡書本冀承顏之歡幾成糊口之患遽蒙宸眷荐錫綸言雖容彭澤之歸仍續鄭均之祿此盖伏遇皇帝陛下堯心廣愛乾體無私

明比日升極大荒而普照恩同春燠慮一物之偏枯雖居江海之遙時霑雨露之澤當圖死報難以言宣臣無任

乞不請支賜添支狀

右臣昨奉勅免持服特授秘書監就差知潭州兼本路安撫使准中書劄子奉聖旨令韶州特支賜錢三百貫文尋赴任次在路奉勅改差知桂州廣南西路都鈐轄兼經畧安撫使已於七月十六日到任上訖伏緣臣昨

者起就潭州差遣所以不敢辭免者蓋欲因朝廷之命起湖南兵甲往廣州策應尋奉勅命改差其任益重非臣本志所貪權寵臣今候楊政到西路商量邊機了日却乞終喪持服兼臣居喪中已奉聖旨支給前官料錢所有特支賜錢見寄韶州軍資庫并桂州合請添支錢物並乞不請領其原受中書劄子一道謹具封納

乞不請中冬翠錦衣襖狀

右臣准桂州牒差人送到勅書一道蒙恩賜臣翠毛細

錦錦旋欄一領者伏念臣自遭荼蓼甫及葦祥屬蠻獠之猖狂廢几筵之號慕未成軍伐屢照天慈且枕塊寢苫禮雖可奪而食稻衣錦心所難安况藥棘之在客顧曳裾而非稱願收渙汗以遂素心已牒桂州更不差人赴京請領所有賜到勅書一道謹具狀封納

回納詔賜冬服狀

臣今月十四日進奏院遞到勅書一道蒙恩賜臣簇四雕兒細錦旋欄等冬服者祇荷寵光不任感懼伏念臣

向遭荼毒歸守邱樊遽屬軍興遂離喪次光陰過隙祥禪未周墨縑經以臨戎蓋先國事裝衣裳而畫飾難處人情願回渥恩庶全素志所有前件細錦冬服乞不請領

謝賜絹狀

右臣今月六日伏蒙聖恩差御藥梁惟一賜臣絹二百匹令臣迎親歸京者伏念臣本遠人素無通識誤膺擢用莫補休明昨求外官蓋欲便於溫清過蒙聖造不令

遠去闕庭未知所報之恩更承非望之賜上荷雲天之
施下為鄉里之光誓捐微軀以答洪覆

謝賜銀狀

右臣今月十三日三班差使殿侍韓喜乘遞馬齎送到
中書劄子并勅誥各一道蒙恩授臣尚書工部侍郎仍
就賜銀二百兩者伏緣殺蕩蠻寇收復邕州並是宣撫
使狄青專摠節制及孫沔石全彬等經畫臣雖同在陣
中功非已出併蒙恩寵實不遑安除就賜銀二百兩已

受領外有齎送到勅誥不敢祇受乞行回納已牒送桂州軍資庫收管聽候朝廷指揮及具狀附遞聞奏去訖

代富樞密辭職表

臣聞君命如天不可違拒臣心所守亦當敷陳臣稟性至愚立朝日淺素無材畧上裨聖明去歲凶奴恃強侮慢中國故作瑕隙形於簡書臣蒙誤知專遣報聘奉陛下之成筭尋先朝之舊盟然而歲增貨財以噉豺虎國力益屈戎心益驕臣復何顏叙為勞效比者陛下推不

次之寵擢臣樞近臣非不知佐時成務致君之遠圖逃
賞避榮立身之小節其如臣之所守非節而已蓋義有
所處理自未安必若長轡遠馭招懷四夷致其酋長稽
首北闕此而為功可也今益以膏血肥其爪牙犬羊無
厭出其本性一旦衝突何能保之恃此為功臣所不敢
伏願陛下精擢賢俊百度修舉臣雖不賞固將安心若
因暫安之勢便謂無窮之福賞雖可冒禍亦何逃臣之
朴誠不欺神理儻或歲月叙遷國朝舊制臣非木石豈

能無心亦非苟徇虛名避此殊寵伏惟陛下察臣誠實
特賜俞允

代狄宣撫賀捷表

臣某言正月十八日至邕州歸仁鋪蠻賊儂智高徒黨
出城迎戰登時殺獲首領黃師必等二千餘人當夜儂
智高焚城將帶殘徒潛遁尋差兵甲及溪峒壯丁襲逐
今月某日已出省地界者萬里奉詞蓋肅將於天討羣
蠻一戰遂收復於邊城中謝竊以國家威靈四方恩涵

八表日月所照悉解辦而來庭舟車所通率輦賁而閱

貢蠡爾廣源之部族本惟交趾之附庸自肆陸梁招納
亡叛乘邊陲之失備興戈甲以內侵焚蕩州閭鈔劫生
聚遠浮江鬱直抵番禺自嶺而南忘戰茲久忽逢衝突
無不驚駭亦嘗屢遣師徒分命將帥軍無部伍人不齊
同勇者邀功而鮮謀怯者貪生而先退賊既未經挫衄
愈恣猖狂臣忝預諮詢日親機宥覩茲醜類能不疚心
久煩旰食之憂敢怠請行之志果蒙睿眷見許愚忠授

成筭以即途加寵名而異數常慮虛叨邊寄不副主知
况彼竊據城池圖為巢穴守於九地之下未易進攻御
以七擒之奇固無良策而乃敢率犬羊之衆前當貔虎
之師意拒轍而甚驕勢破竹而先解橫尸滿野委甲如
山既觸網以計窮遂焚營而宵遁係累者逸老幼得以
再生煨燼所餘金帛積而無筭再獲金城之固幾還銅
柱之封非臣短材能集茲事此盖皇帝陛下宸機電發
睿畧天成事達其情體漢光之遠照師行以律賜魏武

之新書故此克強遽然破碎撫其彫瘵浸惠澤於民心
殲彼狡頑振天聲於方外臣無任

進平蠻記表

臣某言古者興師命將征討四方必有開府之賓參聞
策畧所以廟堂成筭帷幄密謀擒縱之奇俘馘之實以
撰述備史氏之採摭焉故竇憲燕然之勲陳湯郅支之
捷震疊天聲與大漢傳於無窮者用此術也伏惟皇帝
陛下龍德天飛三十餘載塞外無未羈之虜域中無不

順之臣以北胡之彊盛而締於歡盟以西夏之陸梁而
終於屈伏夫何小醜敢干天誅彼儂智高者蠢爾溪蠻生
自凶族稔知邊鄙之無備廣招亡叛以協謀直趨番禺
圖據邕管燔毀者十二郡殺掠者數萬人南方繹騷殆
且半歲陛下出於睿算特命樞臣董統虎貔奉辭討逆
金鼓一震羣凶席卷此蓋皇威奮揚軍政整肅人思用
命使之然也殿中丞馮炳奉詔掌管機宜備見師行始
末自智高舉事以致敗亡凡朝廷處置軍前號令及賊

之勝負一能編之詞無虛美事皆實錄以臣共在行陣
遂抄副本見寄臣嘗忝史官見今之撰日歷者常執簡
於數年之後至乃搜尋採訪罕能完備今馮炳於已事
之際編輯事實一無遺墜竊以方叔南征列在詩雅充
國西伐叙於史贊非獨顯勲臣之績用于以播國家之
休烈其馮炳撰平蠻記二卷已依本繕寫并臣去年准
宣撫使劄子准樞密院劄子奉聖旨殺到蠻賊尸首築
為京觀仍立石其上鐫記年月及殺獲人數臣尋撰成

京觀記刻石立於邕州歸仁鋪蠻塚之側又於桂州北門之外就崖石磨刻出師平賊受箠凱旋年月以宣示皇朝威令用肅遠方今併此碑文別為一卷同馮炳所撰記共成三卷謹隨進呈伏乞宣付史館

賀生擒儂智高母表

臣某言十月二十四日於大理國特磨道生擒到蠻賊儂智高母僞稱太后阿儂并弟儂智光男儂繼宗儂繼封等尋差管押於今月初五日起離邕州赴闕去訖皇

化遠覃通九譯而無外天誅所及雖萬里而必擒中謝
伏以國家三聖開基千歲接統鬼區請吏海表同文嗟
彼蠢蠻產茲悍婦會於凶族濟以姦謀篡父黨以假權
屠子婿而兼土自開邑部靡識君師習為豺狼遂生蛇
豕去附庸之舊壤并傍近之小區侵軼省封偷延歲律
邊臣罔上不以實聞寇孽野心因之內侮以至燔毀郡
縣係虜吏民東剽番禺北窺桂象屢徼王命圖據邊關
所賴者睿筭受成樞臣總律犬羊之衆迎刃而亡禽鳥

之驚棄巢而遁永言夷域絕異華風毒霧鬱而上蒸銳
旅艱於深入假辯士之緩頰誘羣蠻而協心峒民授甲
以赴期寇黨倒戈而自請衆謀亶集元惡就擒猶託井
蛙而自尊豈知天網之難漏本根既舉枝葉必從菴是
炎荒漸紓邊患此蓋皇帝陛下堯仁天覆漢詔春融恢
皇策而俗既大同疊天威而遠無不諛故得九夷之外
聞恩信以咸來一惡所歸在逃遁而靡隱罔遺寸鏃遂
獲渠魁再清銅柱之郊庸正藁街之戮亮惟朝著同震

懼聲臣伏限守任邇州不獲抃蹈闕庭臣無任

賀誅儂智高母表

臣某言據本州進奏官申蠻賊儂智高等大理國已斬
除訖奉聖旨阿儂腰斬儂智光儂繼宗繼封各處斬訖
者卉服之蠻敢干國紀蒙街之戮用正天誅中謝伏以
國家道貫百王德涵萬寓東漸西被邈踰堯舜之封北
洽南翔迥溢漢唐之域蠢茲凶族素隸侯藩嘗竊地以
逃來因拒闕而弗納而乃贅居邊境盜弄兵鋒驅掠吏

民燔劫郡縣久安之俗聞寇則驚守長棄城而悉奔士卒投戈而自潰乘此繹騷之勢肆行僭擬之名母號感星年稱啓歷蹂踐者十二郡屠害者數萬人還據金湯圖為窟宅繇是睿謀獨斷樞輔專征廟堂之算有成步騎之師齊進爪牙雖衆當一戰以皆摧巢穴既傾棄六親而莫保寓所生於假父之國投孤族於遠夷之君過為巧詐之詞自作偷生之計殊不知天下共惡神理弗容蠻貊雖遙恩信可結元兇支黨先從原野之誅頑媼

孽童卒伏市朝之法國章明備式昭雷電之威天網恢
疎難漏鯨鯢之戮四方共快萬口同詞臣伏恨遠守郡
條不獲蹈舞闕庭臣無任

賀曲赦表

臣某言今月初一日馬遞赦書一道至安撫司以殺獲
蠻寇收復邕州曲赦廣南東西路者登時同官吏集衆
宣示軍民依例施行訖狂蠻竊發遽騷嶺海之邦庶彙
重蕪遠霑雷雨之澤

中謝

伏以國家接千歲之統擁百

神之休一六合而同風重九譯而修贄蠢然獠族素附
交城父為戮而不悛母同惡而增酷廣招亡叛庸濟狡
克窺邊隙以漸深極兵鋒而為暴遠趨南海戈鋌肆掠
於越郊還據兩江文檄徧邀於黃洞妄祈枝附潛覬土
疆赫王怒以遣師輟樞臣而總律顧茲烏合未測天亡
初居井以自深俄當轍而來拒犬羊雖衆聿成膏斧之
誅羽翼先摧遂起焚巢之計既已驅除醜類恢斥邊關
捷布繼聞德音遽霑念深黎庶懼此憫凶特推恢大之

恩仍協發生之候此蓋皇帝陛下乾剛下濟天惠周施
澤兼被於存亡民用忘於疲瘵拯其焚溺匝南夏而永
康育以慈和與萬方而同泰臣無任

賀德音表

臣某言准尚書刑部牒准皇祐六年三月十七日德音
改皇祐六年為至和元年應四京及諸道州府軍監縣
等見禁罪人限德音到日死罪降從流流罪已下並放
當時軍州官吏軍民宣示施行訖先天布令以召四時

之和罪已興言特引萬方之過邦刑是恤聖德惟新中
謝竊以日月之行固違常數天人之應必感至誠永言
合朔之期或偶二交之次遂成虧薄著驗經躔崇社責
陰春秋之故事避寢修政帝王之舊規恭惟皇帝陛下
道迫大中志深寅畏因三辰之示變詔六職以修方特
推汪濊之恩躬行消復之要渙紀元之大號期敷祐於
羣生更也之明兆民共仰霈然之澤函夏同懽臣伏限
守職邊郡不獲抃蹈闕庭臣無任

賀南郊赦表

臣某言今月十六日馬遞赦書一道至邕州以十一月十四日南郊禮畢大赦天下者當時集本州官吏軍民等對衆宣示依例施行訖昭事上帝式遵大報之儀敷錫庶民庸洽來同之福中謝恭惟皇帝陛下接千歲之統逆三神之釐震威九區化覃萬寓偃閑師節宣暢淳風年穀屢豐瑞典不絕玉幣涓潔虔事天之誠壇廟肅祇無嚮親之孝膺天地之貺故二儀合祭而有嚴承祖

宗之休故三聖偕侑而為始禮交樂具物遂時康均此
純禧霈然諸夏神明來格求福不回瑕穢蕩清與民更
始至於斥去告訐裁減賦租誠誅求之官釋逋負之責
斯皆講盛德之事隆太平之基凡有歡呼萬邦同夫臣
伏限守職邊郡不獲抃蹈闕庭臣無任

賀裕享赦表

臣某言今月十六日准樞密院遞到裕享禮畢大赦一
道當時集官吏軍民宣示施行訖宗祊絜祀講墮典以

親行雷雨湛恩匝綿區而普及軍民踴踊中外歡呼中
謝伏以國家祚稟赤精運興累聖藝祖題期而立極神
宗奕葉以承休迨文考之握樞至太平而輯化並垂千
古之餘烈此皆百世而不祧恭惟皇帝陛下祇適先猷
大寧諸夏固嘗備潔牲玉奉見郊丘啓八陛之壇答二
儀之貺侑三聖於上帝祔羣后於閔宮親籍田之耕配
明堂之享惟茲合食之盛祭久委有司之攝行舉是闕儀
允為大典辨昭穆之序正乎東向之尊均朕臚之禧表

乎祀事之重漢詔寬大齊民樂康減賦罷征乃人心之
至願恤災宥過實王政之所先垂髫盡識於昇平戴白
同懷於悅豫臣無任

謝恤刑表

四序均和聿屆蘊隆之候萬邦在宥爰推欽恤之仁中
謝切念臣本乏吏能謬當州寄屬傷夷之作起復忠愛
之未孚粵此撫封寧無滯訟涉茲煩渥或窘狴牢上軫
宸聰俯憐遐俗譬諸籠檻開以尉羅特示哀矜之懷庸

頒寬大之詔敢不恪遵漢制祇稟堯言獄未逮於簡孚
情靡忘於伏念庶俾係累之者無嗟暑暍之傷恢布聖
恩遠周邦域

謝賜歷日表

恭以國家政通三統德輯羣元應淳曜以題期罄幅員
而受朔臣濫階儒學猥領郡條因史官推策之勤見聖
人先天之用奉本朝治象之法式謹王正示庶民啓塞
之時裨知帝力臣無任

謝傳宣撫問表

臣某言今月初九日入內內侍省內侍殿頭張昭壽到
昭州蒙恩傳宣撫問者中謝伏以國家恩涵四海威疊
八荒蠢茲徼外之狂蠻素號日南之小族自焚廬帳深
入封疆未即誅夷上煩宵旰臣才非通濟命本羈孤誤
分方面之憂適在傷殘之後道路之勤雖至犬羊之戮
尚稽方懼國章遽傳天語王人之重來自日邊口勅初
聆如親帝所愧之前茅之慮或深挾纊之恩敢不誨諭

師徒數陳逆順共勵在和之節庶成破賊之功無使腥羶得還巢穴上依睿筭期振天聲無任

謝傳宣撫問表

臣某言今月二日入內內侍省內侍殿頭高居簡到州伏蒙聖恩傳宣撫問者人自日邊遠頒於休命語傳天上如對於清光揣已甚微荷恩至厚中謝恭惟皇帝陛下丕承景運祇配嚴禋內盡志於祖宗畢薦誠於嶽瀆臣忝分朝寄適在海邦光華之使斯來郁穆之言遽及

鞠躬聽命初同楚續之溫闔郡改觀共識堯雲之澤但臣無任

慰溫成皇后張氏薨表

臣某言進奏院正月八日追冊溫成皇后張氏薨謝者
函夏之廣聞問咸驚中謝伏以溫成皇后德稟儒門化
恢嬪則動守珩璫之節退思圖史之規樛木稱賢協隆
陰教藏舟茹嘆遽掩春華恭惟皇帝陛下特軫宸慈俯
追遺懿禮崇三翟增象服以伸懷慙動六宮引鸞輅而

加愴臣無任



武溪集卷十六

欽定四庫全書

武夷集卷十七

宋 余靖 撰

啓

謝帖職啓

右某啓伏奉勅命蒙恩充前件職者天獎曲成寵典過
厚內省鄙薄榮懼交至伏念某本惟庸淺生在遐陬弱
歲就學則經無師範長年力行而才非老成常構霧而
自知加鑽勵而怠倦且以有道之士樵夫笑其詖諧安

平之時君子耻乎貧賤期慷慨以有立乃徒步而西遊
屬皇德休明崇尚儒術廣求俊秀延及幽陋謹鄉遂之
舉旅登仕途擇羣萃之材首膺嘉命越在官次固亡治
聲徒稽史資屢進榮秩間者以遷固舊學貫穿博乎羣
書范謝所錄撰述推其良史向在先代摹於上庠雖十
金置市淮南莫之能改而五經在黌廬生得以裁定咨
於前訓釋以所聞歸赴未央之朝雜上公車之奏敢期
震矚擇用狂言不遺一介之善以廣同文之化石渠平

議揔以鉅儒中秘舊藏採其通說再易歲月僅終緝綴
紕繆畢去固周於叅檢蠹文未辨猶示於傳疑重紆綈
几之觀頗愧雲臺之議豈謂薦言屢上睿澤猥加錄其
微勤升之華貫伏惟昭文僕射相公秉惠和之德輔欽
明之君宣百王未舉之政扶萬世不傾之業裁成庶務
明昭百辟薪樵克充於用白黑不逃其形而況承明之
庭漢儒列於侍從東壁之府唐制專乎刊修所宜推澤
俊髦收集英乂博求濟理之具以永無窮之聞必若望

實外著器識兼遠屬詞典瞻知禮樂而能述立行端方
敦名教而為樂苟中茲選則惟其人夫何鯁生玷是榮
命儻以稽合同異糾正舛忤此而可褒謂之必稱則蔡
邕璧池之本鐫刻以為勞鄭默蘭臺之經嘉歎而尤著
未聞前世推以厚恩揆茲非次之榮迥出常均之外蓋
由熙寧在運明哲主謀譬陽春之和土靡境垧大明之
照物無幽隱用致鑛頑亦被光渥敢不勤服素履祇率
攸聞黃卷之中稍研治體一官之守無隳國經庶答已

知以逃羣謗某無任

謝知英州狀

右某伏奉聖恩授前件差遣者祇荷寵光不任感懼伏
念某才非出類智不適時始懷銓而備官遽越俎而蒙
罪三遷歲歷再食門征既無狀以昭明固甘心於棄逐
豈謂自天灑澤解網均恩眷言喬木之隣邦付以小侯
之全壤光生里閭便為竹馬之期榮被親闡仍遂蘭陔
之使此蓋某官素垂枚拭力掩瑕疵致此顓愚復沾甄

錄敢不勵精士檢祇率郡條上答天慈旁酬恩造

謝知制誥啓

伏蒙恩制授依前官知制誥知諫院者天獎發中星垣
要切祇膺寵命以榮為憂竊以國家設正諫之官上叅
國論開內史之府述宣王言所以烝進英髦充備局闔
乃能規益謀慮申布詞令鼓動萬物渙汗四方故非輕
才所可兼任如某者稟生竒隻賦性蔽蒙乏通識以濟
時無獨行而高俗早違農畔遠託師模才不稱於里閭

譽不宣於庠塾伏自皇明繼照側陋旁求一與計偕即
迂官簿甘心州縣之役絕望英俊之游尋以庚午詔書
恢復科試網羅數路寤寐衆才名在選曹特殊制目天
人三道之要每得數陳甲乙十題之問僅能酌對進承
匠署出綰縣章學政未工幸逃官謗嘗刊史簡之誤入
聯書殿之華一忤貴權遽逢譴逐雖聖恩寬惻追還近
甸而私逋奉養乞洩遠蕃初詣守土之榮已報終堂之
痛七更歲律再見闕庭垂紳抱輶克還舊物文昌典祠

之重奉常贊禮之勤在于攸司罔敢尸曠屬台臣退老
聖政惟新總攬權綱思廣言路豈期疎闇亦蒙延獎進
無當世骨鯁之論下愧芻蕘退闕侍親晨夕之養外慙
烏鳥誠雖許國義切所天累上封章願假麾守宸慈下
照恩賚曲霑俾迎親輿就居京轍徒增忝冒無補休明
未伸執簡之勞遽進代言之秩天居近密法太紫之崇
國命宣行當出納之重寧容底滯玷此選掄此蓋相公
樂育敦懷緝熙成績權衡不撓陶冶無私先為萬乘之

容不棄一材之用謹當砥勵名節祇率忠規貴賤不易
其心險易不更其守勵謇諤之節啓寤天聰演深厚之
辭少裨政體過此以往未知所裁

謝知制誥啓

謝外任
并兩制

蒙恩授前件官并差遣者伏念某稟生竒隻賦性救蒙
乏通識以濟時無獨行而高俗嘗刊史簡之誤入聯書
殿之華一忤貴權遽逢譴逐七更歲律再見闕庭趨茅
蕝之通班帖共載之舊職引裾伏諫無蹇正之風簪筆

記言寡良直之譽遽蒙天獎進補掖垣累辭避而莫從
顧忝竊而尤甚此蓋某官因雲洒潤伐木求聲素敦推
致之誠用集亨嘉之會惟上圖於報效庶無負於朋游
過此以還罔知所措

謝知吉州啟

右某啟伏奉勅命差知吉州軍州事已於八月四日到
州赴上訖伏念某起自寒官本無遠圖偶逢聖明遂玷
清近論人君之得失正史氏之褒貶典西掖之綸綍領

中臺之衡鑒寵任皆過毫髮無裨伏況行人之官列辟
所選銜君命以申信歌皇華而戒途四方式瞻專對為
重且以朝廷之大髦彥比肩至如識周古今言躬治亂
蘊厚重之器抱通博之才可以出鋒穎於囊中暢威聲
於方外者濟濟盈廷不可勝數而猥辱僉議獨當重委
不能死請以堅避讓之誠偶得生還果貽狃習之患原
其所坐當伏嚴刑尚蒙寬恩俾領便郡此蓋伏遇昭文
相公燮調元化開濟萬邦思九德之咸事慮一物之失

所特形敷奏見軫孤危遏彈射溢惡之詞敦國家馭吏
之體正從薄謫庸示深仁風波垂拯於畏塗日月遂回
於曲照再蘇朽瘁敢忘厚恩然念方今甲兵漸息賦歛
必省謹當奉朝廷寬大之詔求古人簡易之理削去苛
橫勤詢疾苦庶竭駑蹇少答恩私徃此以還罔知所措

謝克集賢學士啓

伏奉恩守本官克前件職不許辭讓者更能非稱謬當
方面之權恩典曲施再叅文雅之選祇膺寵渙彌切憂

兢伏念某世系孤平性識疎闇內惟輪翽之無取早嘗
英俊之並游抱槩非工濫巾書府伏蒲何補尸祿諫垣
進掌王言靡成深厚之訓對持史簡曾微良直之才每
慮滿盈果貽謗缺闔門惶懼謝絕親賓築室逍遙自安
藜藿因之就養甘此終身豈期乾坤再造於鴻恩簪履
不遺於舊物起自謫籍付以州麾奄邁私艱復還故里
屬當夷寇倣擾邊陲遽丹詔以臨門俾墨綬而即路單
車獨進初慙應變以非長元帥專征乃幸因人而成事

以至故關脩復首惡遁逃宣大國之威靈結羣蠻之信
誓就擒魁媼并係孽童雖名捕之尚遺顧烽煙而稍息
願還印綬追襲苴麻遽沐渙恩特加近職將軍旗鼓猥
留乘障之居道家蓬萊重踐育才之地深惟任遇敢忘
品題此蓋伏過某官體國宣慈代天育物功深構厦廣
攬於羣材德茂調元不私於寒谷永言鄙陋無間甄收
謹當董練武經修明政體奉朝廷畫一之令用致民和
宣皇家無外之風永銷邊隙上答雲天之施次酬衡鑑

之恩過此以還罔知所措

謝再任桂州啟

伏奉恩命特授尚書戶部侍郎依前充集賢院學士知
桂州候今任成資日仍令再任并准樞密院劄子奉聖
旨依前降指揮不許辭讓者伏念某本無遠識早玷通
班向緣蠻事之興遽委州麾之重墨綬從政徒廢居喪
之儀尺籍理兵素乏臨戎之變賴睿謀之遠照命元帥
以專征一戰成功已濫分於賞典三年奉計當例被於

更書忽捧詔音就宣恩旨以謂狂蠻干紀既伏於逋誅
服嶺頒條宜諳於故俗俾留州任庶曉物情再念某頃
被中傷嘗居冗散頗得田園之樂靡思軒冕之榮當警
急之期聞命敢忘於濡足及牧寧之際私心誠願於退
身再露封章上千旒宸未從報罷仍俾拜嘉此蓋伏遇
昭文相公道廣包荒誠深誘善洪鈞造物靡私動植之
恩寒谷回春曲借發生之氣致茲樛散荐被龍光謹當
詳練武經勵精政體邊亭警備異銷桴鼓之音條教布

宣庶協蒲蘆之化上答乾坤之造次酬陶鑄之私過此
以還罔知所措

謝知潭州啟

右某啟伏奉勅命就移前件差遣已於今月二十三日
到任上訖伏念某器非應務才乏適時蓋識淺而慮昏
故毀多而譽少嚮以哀纏風樹歸處邱樊屬當蠻事之
興首預詔除之目三湘假守初令備禦於封陟五筦董
戎遽俾親臨於矢石矧機籌之素情懼首領以難全所

賴者元帥摠其中權適臣定其遠制乃容無似於此備員以至大慙遐奔子母不能全其族外夷協比斧鉞得以正其誅皆上稟於廟謀致甫消於邊患因之積歲幸免瘵官念婚嫁之失期願珪符而易地果蒙俞旨還撫舊封顧忝竊以居多實權衡之有託此蓋伏遇昭文相公明謨特出廣度异容謂其嘗辱於埏陶未忍遐遺於林藪過形敷奏猶假寵名敢不祇畏簡書詢求疾隱蠻溪戍嶂圖銷未弭之兵士里農閭期問未康之俗庶展

宣風之效庸酬播物之恩

謝知青州啟

右某啟叨奉聖恩就移州任已於今月二十五日到任
上訖伏念某器能闇淺學術空疎早在屏居分絕榮路
旋由喪次起赴邊防微效莫申優恩屢及瀕湘舊國獄
訟實繁嶺海名邦風俗尤古係當委任皆揔偏方授寄
則深揆才非稱譬諸毛羽居腹背以無堪付以藩宣慙
股肱之為重此蓋伏遇某官誠敦與善義切包荒不求

備以取人為之地而延譽密形獎飾致竊寵光敢不祇
率國經詳求民瘼用圖綏緝以報恩私

謝知廣州表

右某啟叨膺睿渥出布藩條祇荷寵光不任感懼已於
今月十八日到任上訖伏念某器非適用智不逮人初
既謝於才升中亦罹於毀廢間蒙驅策頻易炎涼謀無
補於臨戎寵屢叨於進律去歲載馳驛騎重見闕庭猥
當諭指之行殊乏綏邊之畧暨於復命惟俟黜幽遽陞

綱轄之司仍領藩宣之寄下慙猛士徒字於四方仰愧
文昌甫聯於八座此蓋某官義敦與善德極包荒密為
敷揚致茲忝冒敢不體國家忠厚之化完邦俗利害之
源無露才以近名冀順民而成政苟能逃於官謗期勿
負於已知

謝轉工部尚書啟

右某啟叨奉聖恩擢遷官品無從遜避徒積憂兢伏念
某才謝適時器非經遠幸緣孤直誤記清衷擢自書林

超居諫路以至殊隣專對西掖代言謗篋將盈遺簪罔棄嘗親臨於矢石幸免喪元曾無紀於旂常徒煩捨爵屢統綬於武節久陪貳於文昌比者上聖登遐真人應運堯仁舜孝百世承基乾健離明重熙繼照俊德旁羅於百辟惠澤廣宣於八紘爰及疎蒙亦叨甄叙此蓋某官曲加題品俯念哀殘列郡承流已忝股肱之寄六曹平奏俾陞喉舌之官謹當祇率政經防弭官謗惟圖死節上報國恩過此以還罔知所措

答淮南轉運段學士啟

右某啟某嚮以瑣材濫躋通籍無沉默之量而克從於
衆慕耿介之節而不得其宜天子以法冠彈非諍臣縫
闕過是疎遠不預謀議况黜陟之際喜怒難回輒陳囊
封果觸天憲投棄南服列為冗官蟾蜍奮臂誠不量力
鷓鴣一枝亦返其分自惟生長草野性仍寡合進無左
右之容退非邱園之秀幸得垂纓抱轡趨走臺閣遠方
之人寧復他望且據權之與失寵孰為輕重當國之與

孤臣孰為勢利苟曰樹黨以營其私則匹夫僮婦猶知所向區區之誠豈在身計而朝奏暮遂坐為比周痛哭疾首自明無路冉冉貶所亦既逾年庭闈千里不遑三釜之樂忠賢盈朝未賜一言之佑然則捨生取義尚欲為之榮通醜窮固非本志但恐陷此罪罟不為正人所憐此蓋伏蒙運使學士敦樹風義遠錫書教靡諄狂狷猥形膏飾如在寒谷得逢陽春免為妄人自今日始儻得天下賢士共持此談則雖終身窮賤不自深恥某無任

回兩浙轉運葉學士啟

右某啟生於遠方不達時務疎網在上自觸機關孤根
立朝翻坐朋黨罹此重辟誰為明之雖蒙聖恩追還近
郡而二親垂白僻在嶠南晨昏既遙甘脆仍闕負罪未
釋靡敢自陳涉江踰嶺因得私覲間關往還七十餘里
近於秋首方抵所局斗筭祿微管庫員冗智力俱困正
在此時常所友厚悉欲委棄同年道卿學士靡汙物態
再貺手幅交情不移於貴賤善導如接於風儀感愧已

還仰覽無數仍聆乞閣史筆歸謁詩庭昔聞三釜之樂
有踰萬鍾之貴自非淡於榮味篤在孝愛者孰能與於
此哉某親哀蒲柳身陷罽羅寸心惶惶瞬息增懼儻逢
渙汗幸脫羈紲當圖南還以潔羞膳久服高義願附子
臧自誓此誠有如白水未由覲覲言不盡意

回狀元宋內翰啓

右某啓某賦性魯拙為學空疎向因舊史之闕文獲承
大匠之諄誨玕珉賤質徒費磨礱瓊瓊甌材易成玷闕

身與禍會勢無還期不敢復以封題上污恩舊三年於茲矣近者湯羅一解漢詔甚寬鄉郡長人容臺進秩皆出望外釋然南歸天慈甫臨家禍已起偕陔之請徒竭肺肝懷章之行遽變線經誠願不遂悲酸倍增豈謂狀元內翰包荒為懷墜甑猶顧遠損緘誨下撫窮愁垂照至深仰覽無數銜恤之外惟知感恩儻全殘生敢忘厚德

回賀孫學士啟

伏蒙尊慈以榮陞清貫時惠華牋歡慰之餘但增祗悚
竊以昔漢武用兵四夷朝野多事而嚴助朱買臣之徒
以文學侍左右內與大臣辨論得失外使四方專達詞
令然未有職事之稱唐初開秦府以攬英傑儲將相之
器誠上選也今歷茲顯秩實為殊榮

回賀彭舍人啓

伏惟某幸以寡聞早陪俊軌濫巾綸閣方懷糠粃之慙
塌翼江風更羨雲霄之舉其於慰抃寧有等夷

回賀吳內翰啟

右某啟伏審光奉聖恩榮陞禁署伏惟歡慰恭惟審官
內翰佐王遠識經國長才器含金玉之英詞兼江海之
潤宸庭奏對窮精稔而甚微言路推誠判忠邪而無隱
視進退而惟道履險夷而一心嘗遠握於漢旄誓弗襲
於胡服直聲振於蠻貊高節貫於神明猶以他規亟從
外補士頌中和之職民移愷悌之風母俟更書遽還綸
閣前席帝所當顧問之益隆持橐禁中增羽儀而為重

官無留事日告遠猷果從玉笋之班進保金鑾之直職
居要近極為儒者之榮業茂弭綸佇正弼諧之任某猥
叨邵寄久絕英游豈謂謙光特迂誨尺喜忭交集數叙
奚周

賀梁相公啓

右某啟伏審光膺制命誕告王庭授將鉞之崇資領帥
垣之巨鎮伏惟歡慰恭惟經畧太尉相公識窮治亂業
茂經綸至誠格萬物之和一言備四時之氣陶鈞庶彙

恢陳體國之謨翼亮宸嚴義極濟川之用向從誠請暫
遂均勞隴底綏戎外撫之勲益顯關中阜俗勤歸之望
愈隆將還台鼎之居先正齋壇之拜矧茲全晉控西北
之二陲委以中權靜河汾之萬里併安危之注意彰中
外之一心佇書功於旂常復奮庸於廊廟行躋寵數允
副具瞻



武溪集卷十七

欽定四庫全書

集部

武溪集卷十八

詳校官給事中臣李臺

檢討臣何思鈞覆勘

覆校官中書臣呂雲棟

校對官編修臣沈清藻

謄錄監生臣王鉞

欽定四庫全書

武夷集卷十八

宋 余靖 撰

雜文

書譚氏東齋

人之志於道者在乎去煩釋累靜慮和衷視聽動息不
汨不誘然後以居者則安以學者則專自非離塵絕俗
不能至於是也吾友譚君伯顧自桂林佐邑遭私艱還
第素冠彌時不營他務乃相廩居之東二里而近出氛

雜卜岑寂面江倚阜披雲躋陰廊地數畝作為齋舍上以屏去人事下以訓勵子姓已得其安子姓得其專有志於道者也屋不加飾地不祈廣藝林駕泉自適而已圖史机案旁無長物所謂不見異物而遷者也邱壠不遐日得瞻睇不忘其親者也吾友之意也深矣一日携僧泛舟而謁之愛其清曠又嘉其子弟甥姪翼翼如也因書其壁皇祐二年七月日題

從政六歲

清歲

政為民綱清本士節立於寡過先乎自潔根不堅固枝
必顛折勿謂何傷多其藏者厚其亡勿謂終吉悖而入
者悖而出金滿堂而莫守玉無脛而能走君子臨財貴
乎無苟計日受祿孰憂不足飲馬投錢孰曰非賢不義
如雲前聖所陳不貪為寶先儒之道所以甌雖生塵德
及吾民珠能還浦道光信史去惑畏知千古仰之嗚呼
幽有鬼神明有斧鉞貪彼賕餉過乎豪奪罪盈於貲陽

誅陰罰何如砥礪清名不滅

公箴

厥初生民固有紀極羣居雜處鬪智競力乃建官司分
其曲直所以衡鑑所以糾黜抱公絕私是為率職惟柔
惟佞腹心之病惟端惟方政化之綱勿畏於勢受人之
制撓法用情為害不細勿黷於賄移人之罪鬻獄奉身
其禍可待無徇威名以作煩刑嘗聞嚴母掃墓而迎無
貪寬恕以售虛譽又聞晉官稅政者去張湯輕重其心

漢刑已淫州犁上下其手楚邦之醜是以罪無異罰左
史所旌義不隱親叔向之明尺檠繩直珪方砥平如止
水斯鑒不牽於情不侮慄獨無懼高明其守不更乃國
之經敢告君子參之座銘

勤箴

爵以昭德官惟擇賢怠則廢職勤則政宣恪恭修德厥
德乃全儻俛勵志其志乃專譬如農功日夜思焉古之
聖賢名存簡編其智宏達其謀廣淵猶勉於勤奉之周

旋堯燿舜瘠以臨溥天禹乘四載手胝足胼日不暇給
周道以完介冑蟣虱漢業以安君既勤止臣寧曠然周
公握髮九有駿奔趙盾夙興盜退寢門官無留事史稱
名臣罔敢自逸書之格言理有不及則罹于愆戮和湏
淫夏攻其昏二王清談晉失其尊養名逋事義和罪人
下臣有聞敢告司存

明箴

函血奮氣爭鬪所起區區強弱茫茫真偽巧詐千端奸

邪萬計或矜其豪以壓顛顛或恃其寤以凌貴勢或狐
託虎威或蚌為鷸制鼠無牙兮穿墉蝸有角兮掠地吏
或舞文人多飾智聚鼯兔以成穴嚇鵲雛而得味吹毛
洗垢極其窺伺滑言柔色肆其諛媚捨狀探情譬於衡
誠邪正區別是為神明軒銅照膽不將不迎爾妍爾醜
安能遁形敢告有位無忘勵精

和箴

水至清則無魚人至察則無徒凌上忽下於義何如剛

而又方失乎正柔而又圓近於佞濟之中和可以從政

慎歲

太行之嶮推輶折轅龍門之浚舟沉楫飜危乎官路邇
茲阻艱巧者爭進擠之疾顛青蠅止棘讒豈無間薏苡
似珠謗亦有端所以去惡者如草之蔓履霜者如冰之
堅太僕之馬數而後對温室之樹問而不言動而三思
靜當有慮儉則易足謙則無忤狠則多爭傲則衆怒好
樂者所貴無荒縱欲者終聞敗度語曰奔車之上無仲

尼覆車之下無伯夷古之訓也慎者從之

書去虎

禺山之陰曰翁永水之源有居邑去刺史府五百里而
近山富毒草水蒙毒霧霧昏草黃夏日瘴熱歷者生疾
故州人憚之邑老吏恃遠且嶮肆詆欺以成俗亡何丞
尉飛書白府云境中三虎暴自踣請以狀聞本朝彰太
守服猛擊強之應太守貪偽名欲市其矯乃召他邑掾
往驗之以成其詐邑掾到境得疾繇是怒而以實對虎

墜窳而死言自蹈者非是邑掾返卧疾且死者久之野
史氏聞之廢書而歎曰罪由古史非丞尉太守之罪也
昔者劉昆宗均以循良著治理劾史氏有猛虎渡河之
說向使政仁且明虎雖在境機埶可制政昏且暴虎雖
出境其害被於千里豈特一虎哉則知虎之去不若暴
之去太史氏以異聞惑中智甚矣哉

契丹官儀

契丹舊俗皆書於國史外國傳矣予自癸未至乙酉三

使其庭凡接送館伴使副客省宣徽至於門階戶庭趨走卒吏盡得款曲言語彼中不相猜疑故詢其人風俗頗得其詳退而誌之以補史之闕焉

契丹之官領番中職事者皆異服謂之契丹官樞密宰相則曰北樞密北宰相領燕中職事者雖國人亦漢服謂之漢官執政者則曰南宰相南樞密契丹樞密使帶平章事者在漢宰相之上其不帶使相及雖帶使相而知樞密副使事者即在宰相下其漢宰相必兼樞密使

乃得預聞機事蕃官有叅知政事謂之夷離畢漢官叅知政事帶使相者乃得坐宮廬中其宣徽使惟掌宣傳詔命而已文譙侍立如閤門使之比

契丹之掌兵者燕中有元帥府雜掌蕃漢兵太弟總判之其外則有北王府南王府分掌契丹兵在雲州歸化州之北二王皆坐在樞密下帶平章事之上舊例皆賜御服節度使叅於旗幟之南乙室王府亦掌契丹兵然稍卑矣其有居鴈門之北似是契丹別族其坐在上將

軍之上又有奚王府掌奚兵在中京之南與留守相見
則用客禮大抵契丹以元帥府守山前故有府官又有
統軍掌契丹渤海之兵馬軍步軍一掌漢兵以乙室王
府山後又有雲應蔚朔奉聖等五節度營兵逐州又置
鄉兵其西南路招討掌河西邊事西北路招討掌撻
等邊事其東北則有撻領相公

國人呼撻字如吞
字入聲領音近康

掌黑

水等邊事正東則有注展相公掌女真等邊事此皆守

邊者也

蕃語注展
即女真也

國中隨部族大小各有節度使不屬

州縣契丹從行之兵取宗室中最親信者為行宮都部署以主之其兵皆取於南北王府十宮院人充之亦有大內點檢副點檢之官以備宿衛北王府兵刺左臂南王府兵刺右臂十宮院人呼小底如官奴婢之屬也此警者呼拽刺音力割反逐部分各有首領及判官等渤海亦有宿衛者又有左右等五比室比音牌亦音櫛比之比契丹調金剛為比室取其堅利之名也漢人亦有控鶴等六軍契丹司會之官雖於燕京置三司使唯掌燕薊涿易檀

順等州錢帛耳又於平州置錢帛司榮澤等州屬焉中
京置度支使宜霸等州隸焉東京置戶部使遼西川錦
等州隸焉上京置鹽鐵使饒澤等州隸焉山後置轉運
使雲應等州屬焉置使雖殊其實各分方域董其出納
也隨駕賜與則樞密院主之讌勞則宣徽使主之

契丹從行之官大臣之外惕隱司掌宗室國舅司掌蕭
氏常袞司掌庶姓耶律氏其宗室為橫帳庶姓為搖輦
其未有官者呼舍利猶中國之呼郎君也不在此籍即

屬十宮院及南北王府矣又有十宮院使亦從行其言
十宮者自阿保機而下每主嗣位即立宮置使領臣僚
每歲所獻牲口及打虜外國所得之物盡隸宮使每宮
皆有戶口錢帛以供虜主私費猶中國之內藏也十宮
院名

興聖宮

崇德宮

洪義宮

永興宮

積慶宮

長寧宮

延長宮

敦睦宮

章愍宮

延慶宮

十宮院使在上將軍之下節度使之上

十宮院制置司

奉聖州平州亦各有十宮院司
檀州有章愍官行唐縣屬焉

契丹司

錄事司

如中國
之府司

左右司候司

掌刑獄

契丹於燕京置元帥府統軍馬軍步軍三司契丹東有
渤海西有奚南有燕北據其窟穴四姓雜居舊不通婚
謀臣韓紹芳獻議乃許婚焉衣服飲食言語各從其俗
凡四姓相犯皆用漢法本類自相犯者用本國法故別
立契丹司以掌其獄

葛懷敏謚議

贈太尉葛公生於將門資性明銳束髮從官即以能稱
彤墀贊導五符監督屢更器使人推其才御下不苛接
上以禮輕貨好與重器貴諾官有所底善聲日聞朝廷
寵嘉付以邊事易京之治至今為最屬西羌怙遠辜我
含育率其大羊觸鬣保障烽燧初舉即有膚施之役鑒
其覆軌寤寐材雋是用起於謫籍授之次將畫野增戍
以固封略氏孽孔熾舉國興師來如蝟毛屯逼城砦言

奮其旅出當賊鋒乘銳急戰卒用屠潰忘軀殉節殞於
旗鼓詔贈旄鉞以旌死事祖載易名式叅前典謹案謚
法臨患不忘國曰忠隱拂不成曰隱若其遠當勅寇師
無後繼勢寡力屈義不苟生可不謂忠乎肅將王怒志
清戎醜衆拂其令投戈莫保聞櫜痛悼雅意無成可不
謂隱乎昔者流矢在馬魯侯誅之握節殞命晉策褒尚
咸用加等式彰義烈繫公勤死宜謚忠隱謹議

祭段待制文

嗚呼天之間氣是生俊德特稟粹精蘊為才識應物成
務代王脩職皇圖所倚譬諸輪翼試之以漸終將康國
量既未克壽胡不克嗚呼天乎世於祿仕不羞苟得或
枉道以容身或買聲而借力公之立朝侃然正色孤根
竦幹古之亮直母后專制戚里濫恩千官結舌喑過天
閭公儔抗憤方幅建言雷霆震怒甘心黜去委吏冗員
處之如僚乘驄憲府和鈇書殿智略再伸周行改觀外
臺主計國無貧歲攬轡觀風鈍頑咸礪南床執法官宿

其業簪笏伏墀權豪共懾粵佐金穀旋登侍從竭誠納
忠言行策用暫擁麾幢殿此海邦鋤姦樹善民夷以康
天胡不慙殲我忠良嗚呼哀哉人之懷才不遭於世或
結隙而被誣或抱忠而見棄既飲痛而莫伸甘捐軀而
自誓猶有生還故都此去遐裔公今於時不為不遇直
道守官自結明主暫斥復還帝其玉汝揚歷清顯勤勞
靡盬旦夕顧問其仕則撫衆推周才可以鎮遠撫封半
載帝亦悔遣紫泥賜書追鋒給車俾公受代歸侍玉除

代公者誰在湘之湄抗旌即道朝露先晞公之未去勵
精愈苦遂使忠魂淪喪茲土公之才良無愧廟堂親逢
旦暮而死災方物理難曉徒怨蒼蒼嗚呼哀哉蠻酋海
客乘風浮舶明月犀象歲至日積昔人北歸不能弭謗
竹簡薏珠方舟蕪量公之戒行朝以俟夕盡室輕裝十
夫之役天若有知延其漏刻俾我後人觀之為則庶乎
無憾以叶柔克嗚呼哀哉脩短之期蓋有常數逝川不
息藏舟靡固人生至此胡其艱茹哀公之喪不得其常

弱息乳齒孺婦空房遠託故國未知存亡哭無由而憑
柩歛不及於帷堂謂暫時之一別遂隔生而可傷昔紫
服兮乘駟今丹旌兮還鄉瞻靈輶之祖載痛川途之阻
長陳絮酒兮一酸淚霑襟兮浪浪嗚呼哀哉

祭高待制太君

惟靈柔明素稱懿恭自飭維韶及艾終始一德結帨留
範誕光女式采蘋承祀克勤婦職卜鄰教子通駸家則
集此聖善刑于燕翼金華勸講訓成忠翊石窀啟封庸

酬慈力福未盈皆壽胡不克嗚呼哀哉修短之策豈其
偕極吉凶之會曷無常域積善之厚享年不億造物之
意終天罔識輶輻啓途銘旌慘色執紼奠罍橫涕沾軾
言瞻蒿里莫知冥默

祭荆王文

惟王系尊帝穆位冠台臣啟宗藩於前世展皇家之茂
親敦叙之恩流於國邸對見之禮厚於家人推勲賢之
莫二冀屏翰於無垠溘委朝露愁生暮雲宸懷為之一

慟民思從於百身蓋棺長夜引紼斯辰國門之祖牲羞
以陳永歸蒿里義愴朝紳

祭孫工部文

惟靈黜山之英生為俊明學探聖域詩合雅聲再以科
進列于王庭豸冠霜簡凜凜持平繡衣朱旆未足于外
二易江城直道無悔粵惟前載寇攻南海烽火飛騰嶺
隅震駭君乘使車聞急驚呼不俟王命遽發銅符救兵
先集團城不孤番禺無虞惟君之瑜帝曰汝材將漕來

此盜據邊關旁無儲峙元戎秉鉞貔貅千里餉饋不續
許之以死君運心計委粟流錢士免飢色凱歌以旋幕
府第勞郎曹再遷當享遐福胡不永年嗚呼哀哉君於
場屋名出輩流作掾南昌始與君游柔圓易安剛方多
滯假守廬陵朱輪相繼生叨郡寄君領監司再任相逢
哀樂是隨君哭吾父我哭君身嗟嗟世人糾纏相因聊
陳薄奠以告營魂茫茫九泉孰聽斯言

武溪集卷十八